

Iluarsiissut

Ataatsimiititaliap isumaliutissiissutaa 3. juni 2019-mik ullulerneqartoq taarserpaa

(Kalaallisuuani iluarsiissuteqartoqarpoq, tamatumani Nalakkersuisunut apeqqutit arfineq pingasut siornanni oqaaseqatigiit peerneqarlutik.)

Maleruagassat atuuttut aqutigalugit aalisarnerup aqutsivigineqarnerata allangortinneratigut Upernaviup aqutsiveqarfiani qaleralittassiissutit tamakkerlugit aalisarneqarsinnaanissaannik UKA 2019 sioqqullugu qulakkeerinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

pillugu

siunnersuutit aappassaaneerpeqarneranut

Aalisarnermut, Piniarnermut Nunalerinermullu Ataatsimiititaliap

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartut ilaasortaq Henrik Fleischer, Siumut, Siulittaasoq
Inatsisartut ilaasortaq Aqqaluaq B. Egede, Inuit Ataqtigiit, Siulittaasup tullia
Inatsisartut ilaasortaq Siverth Karl Heilmann, Atassut
Inatsisartut ilaasortaq Jens Danielsen, Siumut
Inatsisartut ilaasortaq Steen Lynge, Demokraatit
Inatsisartut ilaasortaq Múte Bourup Egede, Inuit Ataqtigiit
Inatsisartut ilaasortaq Hans Enoksen, Partii Naleraq

UPA2019-imi ulloq 15. maj siullermeerinninnerup kingorna ataatsimiititaliap siunnersuut Naalakkersuisunillu allanguutissatut siunnersuut misissorpai.

Siunnersuutip imarisai siunertaalu

UKA2019 sioqqullugu aalisarnermik aqutsiviginnikkut malittarisassanik maanna atuuttunik allannguinnikkut iliuuseqarluni Upernaviup aqutsiveqarfiani qaleralittassiissutit pissutsit piviusut malillugit tamakkerlugit pisarineqarsinnaanerannik qulakkeerinissamik Naalakkersuisut aalajangiiffigisassatut siunnersuutikkut pisussaaffilerneqarput.

Siunnersuutip Inatsisartuni siullermeerneqarnera

Siunnersuut sukumiisumik oqaluuserineqarpoq ataatsimiititaliamullu innersuunneqarluni.

Naalakkersuisunit allannguutissatut siunnersuut

Siunnersuummik siullermeerinninnermi Naalakkersuisut allannguutissatut siunnersuummik imaattumik saqqummiussipput:

Maleruagassat atuuttut aqutigalugit aalisarnerup aqutsivigineqarnerata allanngortinneratigut Upernaviup aqutsiveqarfiani qaleralittassiissutit tamakkerlugit aalisarneqarsinnaanissaannik UKA 2020 sioqqullugu qulakkeerinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

Siunnersuutip piviusunngortinneqarnissaanut piffissaliusaaq siunnersuutip allannguutissatullu siunnersuutip assigiinngissutigaa. Siunnersuutip UKA 2019 sioqqullugu piviusunngortinneqarnissaa siunnersuuteqartumit siunnersuutigineqarpoq. Siunnersuutip piviusunngortinneqarnissaata UKA 2020-imut kinguartinneqarnissaa Naalakkersuisunit siunnersuutigineqarpoq.

Aqutsiveqarfik Upernavimmi ukiuni kingullerni ukiup naalernerani qaleralittassiissutit nungunneqartarsimangitsut siullermeerinninnermi Naalakkersuisunit paasissutissiissutigineqarpoq, taamaammallu Aalisarnermut, Piniarnermut, Nunalerinermullu Naalakkersuisoqarfik misissuisussamik suleqatigiissitaliorsimasoq. Suleqatigiissitaq nassuiaammik saqqummiussissaaq.

Naalakkersuisut aammattaaq Aalisarneq pillugu Ataatsimiititaliarsuaq innersuussutigaa, Naalakkersuisut oqarnerattut pilersaarutaammatt Aalisarnermut Ataatsimiititaliarsuaq juni 2020-mi isumaliutissiissummik saqqummiissasoq, suliniutissanillu UKA2020-mi saqqummiussisoqassalluni.

Sassartitaqarfigineqarnerit

KNAPK 31. maj 2019 Aalisarnermut, Piniarnermut, Nunalerinermullu ataatsimiititaliamut sassartitaqarpoq.

Tamatumani Ilulissaniit aalisartut najuupput. Siulliuniulluni aalisarnerup ilungersunartorsiornarnera oqaatigaat, pisassiissuteqarnerani aalisartariaqartaramik, qaqugukkullu aalisartoqartoqarsinnaanera siumut oqaatigiuminaattarluni.

Ataatsimiinnermi aalisartunut ataasiakkaanut pisassiissutinik niuerutigineqarsinnaasunik eqqussisoqarnissaa kissaatigalugu KNAPK-mit saqqummiussisoqarpoq, qanorlu aalisarsinnaatiginertik pillugu qularnaatsumik isumannaarisooqarnissaa kissaatigaat.

Ataatsimiititaliap KNAPK sassartitaqarneranut qutsavigaa.

Apeqqutit

Apeqqutinut siullermeerinninnermi saqqummiunneqartunut aappassaaneerinninnermi akissuteqaqqullugit Naalakkersuisut ataatsimiititaliamit kaammattorneqarput, taakkunanngalu apeqqutit siulliit arfineq marluk siullermeerinninnermi apeqqutigineqarlutik:

- 1) Sinerissap qanittuani pisassiissutit appaavigineqarnissaat Naalakkersuisunit sulii pilersaarutigineqarpa?
- 2) Taamaattoqarpat, sinerissap qanittuani pisassiissutit qaqugu appaavigineqarnissaat Naalakkersuisunit naatsorsuutigineqarpa?
- 3) Sinerissap qanittuani qaleralittassiissutit appaavigineqassappata tamanna qanoq iliorluni Naalakkersuisunit anguniarneqarpa?
- 4) Pisassiissuteqanngitsumik aalisarfiit atorunnaarsinneqarnerannut atatillugu qaleralittassiissutinik amerlisitsinissaq Naalakkersuisunit naatsorsuutigineqarpa.
- 5) Pisassiissuteqartarnej Naalakkersuisunit atorunnaarsinniarneqarpa, taamak iliornikkut suna anguniarneqarpa?
- 6) Qaqugu Upernavimmi assagiarsunnik qaleralinnillu tunisassiorfimmik aallartitsinissamut Polar Seafood A/S-imut akuersissummik tunniussinissaq Naalakkersuisunit naatsorsuutigineqarpa?
- 7) Suliffeqarfik akuersissummik tunineqarsimangippat, akuersissummik tunniussinissamut inatsisitigut suna akornutaanersoq pillugu ilisimatinneqarnissaq ataatsimiititaliap kissaatigaa? Inatsisit tamatumunnga aporfuppata tamatuma qanoq iluarsiivigineqarnissaa pillugu nassuiaateqaqqullugit Naalakkersuisut qinnuigineqarput.
- 8) Imm. 175-p suliarinerani tunitsiveqarniarnikkut pissutsit ilungersunartut, soorlu Kangersuatsiami unammilleqqusaannginnermut tunngassuteqartut arlaleriarlutik oqaatigineqarlutik qaqinneqartarput. Qaqugu pissutsit tamakkua qulajaavigineqarumaarpat?

Ataatsimiititaliap siunnersuummik suliarinninnera

Ataatsimiititaliaq siunnersuummik Naalakkersuisullu allannguutissatut siunnersuutaannik suliarinnippoq.

Ataatsimiititaliattaq KNAPK-p oqaaseqaatai ataatsimiititaliap suliamik ingerlatseqqinnermini atugassaatut tusaatissatut tiguai.

Siunnersuutip suliarineqarnerani ataatsimiititaliap ajornartorsiutit ataani taaneqartut oqaluuseraat, tamannalu tunngavigalugu Naalakkersuisut sulinissaminni ilanngullugit suliarissagaat kaammattuutigalugu:

- **Uummannami Qeqertarsuullu tunuani** malittarisassat atuuttut iluini aqutsiveqarnikkut allannguinnikkut qaleralittassiissutit tamakkerlugit pisarinissaannut qulakkeerinnittussanik periarfissanik suliniuteqarnermikkut aqutsiveqarfinni allanngueqqullugit,
- Umiarsuarnik tunitsivilinissamut aporfiit qanoq iliorluni peerneqarsinnaanersut misissussagaat,
- Tunisassiorfiliorniarnermi unammillersinnaannginnermut tunngassutillit peernissaannut periarfissanik misissuissasut,
- Nunaqarfiiit tunitsiveqarsinnaanerannut periarfissat misissussagaat, aamma,
- Tunisassiorfiit pioreersut tunisassiorfiliariniarneqartullu ilanngullugit isumaliutigissagaat.

Ataatsimiititaliattaq paasitinneqarsimavoq, Atammimmi tunisassiorfik, sulisunut ajornartorsiutaasinnaasumik oqummik eqqugaasimasoq, tamatumalu Naalakkersuisunit eqqumaffigineqarnissaa kissaatigalugu.

Naggataatigut ataatsimiititaliap ima oqaaseqarumavoq:

Ukiup aallartinneraniilli Naalakkersuisut qaleralinniarnermut tunngasunik arlaleriarlutik imminnut assortuuttunik paasissutissiisarsimasut. Naalakkersuisut iliuserisimasaat ataatsimiititaliamit sakkortunerpaamik isornartorsiorneqarput, ataatsimiititaliap sulineranik ajoqusiillutillu ersarluttumik tunngavissiisarmata.

Siunnersuutip aningaasaqarnikkut kingunissai

Siunnersuuteqartup aalajangiiffigisassatut siunnersuummini siunnersuutip aningaasaqarnikkut kingunissai nassuiaatigai. Siunnersuuteqartumit nassuiaatigineqartunit allaanerusumik naliliinissaminut ataatsimiititaliaq tunngavissaqanngilaq.

Ataatsimiititaliap inassuteqaatai

Ataatsimiititaliap isumaqatigiittup Naalakkersuisut allannguutissatut siunnersuutaa


itigartinneqassasoq inassutigaa.

Ataatsimiitaliap isumaqatigiittup siunnersuutip akuersissutigineqarnissaa inassutigaa.


Ataatsimiititaliap taama oqaaseqaateqarluni isumaliutissiisummilu allassimaneratut paasinnilluni siunnersuut aappasaaniigassanngortippaa.



Henrik Fleischer
Siulittaasoq




Aqqaluaq B. Egede
Siulittaasup tullia



Siverth K. Heilmann




Steen Lynge



Jens Danielsen



Múte B. Egede



Hans Enoksen